



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir\_yimiyim



tir yimiyim

TAPAK 8

**Australia nung tang mezüngbuba tetsür ka army chief akümtsü**

**Ghana nunger football asayar Dominic Frimpong tepsetogo**



VOL. XXIII ISSUE NO. 180 (ADOK 180) DIMAPUR SANGTENNÜ (TUESDAY) RONGCHII (APRIL) 14, 2026

₹ 5.00

## NPP-i ECI dang Koridang nung polling station ana nung re-poll asütsü nenshir

**Dimapur, April 13, 2026 (TYO):** 28-Koridang assembly constituency nung voter tem sota ayu aser ketdangsubarenia meinprong asü anungji polling station ana nung re-poll asütsüla ta National People's Party (NPP)-i taoba nung Election Commission of India (ECI) dangi shidi züluba Hombarnü ano nenshiogo.

NPP-i April 13, 2026 nü Chief Election Commissioner dangi züluba shidi nung parnoki April 9 nü Alichen polling cluster nung tim masüba inyakba kulitem dena ken o benokba atema telangzüba kecha mangu ta shia lir.

April 9, 2026 polling anogo nung Alichen Polling Station II nung voter turnout 15% aser Polling Station IV nung 23% dang liasü aser iba ya meshitak lir ta NPP-i ashi.

Item polling station nung anogo tom ka nung Aadhaar aser voter ID verification den sendaktepa voting asüba anen, ECI observer aser district administration ajanga meinprong aser India Reserve Battalion (IRB) personnel aliba ajanga security tensa tetsübutsäka aküm ta NPP-isa shidi nung shia lir.

## CM Rio-i aniba teloki Lower Tizu semdang

**Dimapur, April 13, 2026 (TYO):** Chief Minister Neiphu Rio den pa kinungsü dena anogo pezünü atema Kiphire district kübok Lower Tizu semdangogo.

April 10 nungi 13, 2026 tashi CM Rio-i anir teshimtet telok kati Pongro Sub-Division kübok Lower Tizu nung sorkari terenlok mapa balala inyakba repringdanga senzüogo.

Chief Minister aser par teloki Lower Tizu nung Tourist Amenities Centre yangluba repringdanga liasü. Iba mapatong ajanga eco-tourism ajungketsü aser visitor facilities tajungba kümdaktsütsü nükjidong lir.

Parnokisa Moya ajanga Lower Tizu road aser Setsu-Lalori-Phor road yangluba semdang. Item lenmang ajanga meta talang pilar artsülen connectivity aser socio-economic development asütsü imlar.

Chief Minister Rio'er telokisa Mimi nung Ranyak Khun Cave semdang aser idakji Mimi Circle Joint Council züngsemtem den ajurutepa sensaksema liasü.

Maneni, ketdangsürtemi polling hours matsülang mesüra voter tem temulung ulutsüsa mapa kecha meinyak ta parnokisa tai tonglokja lir.

Constitution nung Arrla 324 aser Representation of the People Act, 1951 nung lateta aliba ama ECI-i election timi aser tiptema agitsü tebilemtsü khuret bena lir aser polling nung tenokdangba, meinprong mesüra amokmeren ajurudang re-poll asütsü tetuyuba agütsütsü tashi agüja lir ta NPP-isa metetdaksüogo.

Anungji ECI-i iba polling station ana nung re-poll asütsü tetuyuba agütsütsü aser shinga tsütsü mashitsü atema Central Armed Police Forces mapa lemzüksütsü ayongzüker ta NPP-isa metetdaksüogo.

NPP-isa ECI observer, district administration aser IRB personnel ajanga shilem agiba bushisüngdang asütsü aser videography, presiding officers' diaries aser poll records wazüka ayutsü takhangba agütsüogo.

Iba temepishiba nenshia züluba sülen ghonda 48 tsüngda kecha meinyakra Arrla 226 kübok High Court dangi ken o abentsü ta NPP-isa metetdaksüogo.

Iba teshimtet telok nung Deputy Chief Minister (Home and Border Affairs) Y. Patton, Rural Development & SIRD Minister Metsubo Jamir, Women Resource Development & Horticulture Minister Salhoutuonuo Kruse nunger densema liasü.

Maneni, parnok den Dr. Kelhrielhoulie Yhome (Advisor, School Education and SCERT), W. Chingang Konyak (Advisor, Geology & Mining and DUDA), Z. Nyusietho Nyuthe (Advisor, New and Renewable Energy and NSDMA), aser S. Kiusumew Yimchunger (Advisor, Home Guard & Civil Defence, Fire & Emergency Services, Relief & Rehabilitation), MLA Y. M. Humtsoe, MLA Dr. Tseilhoutuo Rhütso, aser MLA Benei M. Lamthiu nunger liasü.

Anogo pezünü Lower Tizu semdangba ajanga Nagaland sorkari meta talang pilar alidak aser arrtsülen infrastructure development, tourism aser lokti den tesentaktep akangshitsü merangba sayur.

## Governor Yadav-i tzü aser merükmejuba osang metetpela

**Dimapur, April 13, 2026 (TYO):** Nagaland Governor Nand Kishore Yadav-i Public Health Engineering Department (PHED) den senden ka menogo.

April 13, 2026 nü Naga Bhavan Conference Hall, Lok Bhavan, Kohima nung pai iba senden ayonga amen aser Secretary PHED, Zarenthung Ezung-i anir PHED ketdangsürtemi Nagaland nung water supply aser sanitation indang osang lemsatöp.

PHED ketdangsürtemi Governor Yadav den Jal Jeevan Mission (JJM) aser Swachh Bharat Mission (Grameen) amala

national programmes inyakba osang metetdaksü.

Nagaland nung April 1, 2026 tashi JJM kübok kilen lakh 3.45 tema nem household tap water coverage agütsüogo aser iba ya 94.91% lir ta ketdangsürtemi ashi.

District aika nung iba mapatong takok ngua inyakdar aser block kar nungbo 100% Functional Household Tap Connections (FHTC) tongtetogo ta parnokisa ashi.

Nagaland nung yimtsüng 1,258 (88%) tashi ODF Plus sangdongogo aser iba ajanga sanitation, solid & liquid waste management aser community

hygiene practices meranga inyakba sayur ta HED ketdangsürtemisa ashi.

Governor Yadav-i tzü akongba, senotsü peria manguba aser maintenance onüktem meyipa repringshi.

Paisa sustainable water management practices tenzüksü, mapang shitak nung mapatong inyaktsü aser loktii shilem tuluba agitsü metetdaksü.

Tzü agi timtemba koktettsü atema rainwater harvesting ya kanga tongtipang lir aser talisa urban aser tzü peria mangudak department-i iba mapa tenzüksü ayongzüker.

## F&CS dept-i FPS/beneficiary ajak dang nenshir

**Dimapur, April 13, 2026 (TYO):** Department of Food & Civil Supplies, Nagaland-i SMART PDS (Scheme for Modernization and Reforms through Technology in the Public Distribution System) tenzüko.

Iba ya Ministry of Consumer Affairs, Food & Public Distribution, Government of India-i tetuyuba agütsüba ama inyaker ta Director, Food & Civil Supplies Vekeoyi Chakhesang, NCS-i sangdong ka nung ashi.

Iba mapa ya tashishitsü malitsü, mapang shitak nung repringtsü aser Public Distribution System nung data ajanga lemtemtem agitsü atema tenzüker.

Nagaland nung May 2025 nungi SMART PDS tenzüka liasü aser Department-i mapang shia iba dak sendakba osangtem lemsatepa arur.

Iba nung transactions ajak atema ePoS devices amshitsü, non-transacted (undistributed) food grains Closing Balance (CB) ama ayutsü aser NFSA Act. 2013 nung lateta aliba ama beneficiary ajak indang e- KYC

asütsü dena lir.

NFSA kübok subsidized food grains angutsü atema Biometric devices (ePoS machines) ajanga kuli agütsür aser iba ya Nagaland densema linük ajungalen beneficiary crore 80.6 temai amshidar.

AePDS portal ajanga ePoS machines nung transaction details bendener aser iba ya NIC Hyderabad, aser Ministry of Consumer Affairs, Food & Public Distribution ajanga repringer.

Nagaland kübok district kar nung Fair Price Shops aser beneficiary temi jangotsü peria manguba indang shiditem Department dangi zülüogo. Iba atema Department-i FPS ajak dang ePoS system nung non-transacted (undistributed) quantity ji Closing Balance ama ayutsü nenshia metetdaksüogo.

Iba non-transacted quantity ji taruba ita nung Opening Balance (OB) ama bendenloker aser timi beneficiary tem nem lema agütsütsü ta Department-isa metetdaksüogo.

Linük ajungalen Closing Balance aser Carry Forward

mapa inyaker aser allocations o transactionsajak RCMS, AePDS, aser IAeSCM amala sabangtem nung bendener. Item ya NIC-i Ministry of consumer Affairs, Government of India den yaritepa yangluba lir.

Tesüiba itatem indang Closing Balance repringshir SMART PDS portal nung itashi jangotsü lemzüksür. Iba nung ajemdaker Department-i FCI nungi jangotsü meshizüker anungji FPS/Village Council FPS ket nung Closing Balance alitsüla ta Department-i metetdaksüogo.

Nagaland nung FPSs/Village Council-run FPSs ajaki SMART PDS kübok operational guidelines sülen anidaktsü metetdaksür kechiyong iba ajanga Nagaland nung NFSA inyakba nung tetsükdaktsü ajurutsü akok ta parnokisa ashi.

NFSA kübok ration card beneficiary ajaki April 30, 2026 matongdang eKYC process renemtsü mepishir kechiyong iba mapa ya meinyakra sorkari lateta aliba ama subsidy entitlements agientsü ta Department-isa metetdaksüogo.

## Police-i ILP malir aika apuba ajanga inyakyim meshitakba sayur

**Dimapur, April 13, 2026 (TYO):** Nagaland Police-i Inner Line Pass (ILP) mita repringba indang osang sangdongba nung anogo ana tsüngda aibelener nisung noklang aika apuba shia lir aser iba ajanga IPL maparen shitak meinyakba sayur ta Inner Line Regulation Commission - Naga Students Federation-i metetdaksüogo.

April 10, 2026 nü ILP malir nisung 436 aser April 11 nü nisung 208 apuba ajanga Nagaland nung nisungtem ILP maliyonga liyonga aruba sayur aser ILP malirtem apuba ya law & order tsüsü takok anguba mapa ka masü saka mapa shitak meinyakteti aruba kuli lir ta

ILRC-i ashi.

ILP indang chichiba olenji "permit" masü Inner Line Pass lir aser iba Bengal Eastern Frontier Regulation, 1873 nung Pass ta jangjajangja zülüa lir. Anungji protected areas telungi aittsü atema "permit" ta amshiba ajanga inyakyim zübazüba kümdaktsür aser iba ajanga mapa shitak meinyakteter ta parnokisa metetdaksü.

Nagaland Police-i apurtem ya tawa arurtem masü saka mapang talangka rongsenketzung maparen inyaka arurtem lir aser iba ajanga lisopur taküm libaliro nung kongshiyogo ta ILRC-isa ashi.

District administration, labour

& trade licensing ketdangpurtem aser municipal mesüra town council temi ILP verification ya teti inyaka aruba maparen ka ama mebenshiba agi bendangertem ILP maliyonga liteter. ILP verification ya khen atema dang masü saka teti inyaktsüla aser yamaji asü nung dang maparen akangakanga akümtsü ta ILRC-isa metetdaksüogo.

Inner Line Pass ya tenüng atema dang masü saka kümzüka ayutsü atema ozüng hadir ka lir. Iba inyakyim shitak meinyakba mesüra aibelena meyipzüka benshiba ajanga lendong bentsür arutsü anungji ILP system akangshitsüla ta parnokisa ashi.

## Konyak nungeri amshiba mozü nung teimla tulu aliba jangjatet



**Dimapur, Rongchii/April 13 (TYO):** Nagaland University, Berhampur University aser Saveetha Medical College nungi researchers temi preliminary investigation ka nung Konyak nungeri amshiba traditional herbal formulation ka nung anti-cancer aliba jangjatet, anungji lisopur temi mozü amshiba nungi scientific tsütsü shia tajung agütsür.

Dr. G. Bupesh, Assistant Professor, Dept of Forestry, Nagaland University ajanga iba research rasaa ashiba video ka <https://drive.google.com/file/d/1hPVQoYTRercMs2-aOkY5HpIZYVakCce6/view> nung reprangtetsü aser download sütetsü.

Akhi alemli nungi amshia aruba mozü tem lisopur temi kanga bulua amshir, aser iba amala mozü agi taneptsü anguba indang scientific yimya nung angatetsü merangba kangabo mali.

Traditional herbs ya kanga bulua amshia aru, ajisüaka tanü-asüng scientific tools amshia itemji tejangja angatetsü merangba kanga ajema lir. Tang

tesüsa merangba yagi iba tawa nung apu latsür.

Institute balala lungjemer research agiba mapang plant polyherbal formulation pongu nung temulung agüja bushisüngdang aser iba indang 'bioactive compounds' yagi VEGFR2 nung kanga junga tenük yokba bushitet, koba tumour blood vessel aintsü asoshi tongtipang protein ka lir.

Parnoki bushitetba ya Microchemical Journal (<https://doi.org/10.1016/j.microc.2026.117666>) nung adoktsü.

Iba kaket ya Longnyu M. Konyak, Giridharan Bupesh, Parthasarathy Sudharsan, Nokenketla Jamir, Sidhartha Saikia from Department of Forestry, Nagaland University nunger tem külemi zülu aser Berhampur University aser Saveetha Medical College nungia yarisema liasü.

"Lisopur shisatsü den advanced molecular simulations lungjemer bushiba nung tang amshiba mozü-i mapa inyakba den sako compounds tem ngutet aser 'toxicity' ajema

aliba ajitet," ta Prof. Jagadish K. Patnaik, Vice Chancellor, Nagaland University ajanga ashi.

"Konyak tribal healers temi amshiba plant formulation tejangja pongu scientific yimya nung asadangba ibai mezüngbuba alitsü aser advanced computation methods amshia kuli agütsü. GC-MS analysis aser molecular simulations ama advanced techniques tem amshia onoki anti-cancer potential tashi tait aliba compounds jangjatet, koba tang amshiba mozü tem den mesüktepa lir," ta Dr. G. Bupesh, Assistant Professor (Natural Products and Tribal Health Research), Department of Forestry, Nagaland University ajanga ashi.

Parnokisa item compounds ya natural anti-angiogenic agents aliba sayur ta bushitet, koba agi komo tuluba akumba soita ayutsü akok.

Parnoki jangjatetba compounds timba nung toxicity ajema aliba aser acceptable pharmacokinetic properties aliba sayur, anungji tarutsü nung mozü yangluba nung amshitsü teimla aliba sayur.

Iba yagi lisopur shisatsü bhusemba kisüng masü saka jenjang talangba nung nature nung ajemdaker mozü bushitsü lenmang tasen lapoktsür, ta parnoki ashir.

Tang parnoki ngutetba ya computational analysis nung ajemdaker lir, aser ano tali jangjatsü atema laboratory aser clinical studies nungdaker, ta ashi.

## State nung Foundational Learning Study tenzükogo

**Dimapur, Rongchii/April 13 (TYO):** National Council of Educational Research and Training (NCERT) nung keta aliba National Assessment Centre (PARAKH) ajanga linük tesem ajunga nung Grade-3 azünger kaketshir 'foundational competencies' asadangsü atema Foundational Learning Study (FLS) 2026 agiba mapang lir.

Nagaland nunga iba study ya April 13-14, 2026 anogotem agir. Iba sentong nungya district 10 nungi sampled schools 70 nungi kaketshir 798 shilem agir.

Iba maparen tajungtiba nung inyaksü mechi workforce balaka yoka lir, kong State Level Coordinators ana, District Level Coordinators 20 aser Field Investigators 70 alitsü.

Iba den ano Field

Investigators 11 standby nung renema yua lir. Iba study yagi kaketshir 798 indang sample awajemtsü, aser parnok ya private aser government school tem nungi alitsü.

Foundational Learning Study yagi kaketshir tem angazükba indang data tajung bendentsü nükjidong lir, koba amshia policy yanglutsü aser foundational education tashi itshtitsü.



District Economics & Statistics, Mokokchung nung April 13, 2026 nü Birth Registration-Based Aadhar Enrolment Initiative kübok Distribution of IT Equipment (Phase-1) atema sentong agidang tangokba noksa nung Secretary to the Government of Nagaland, Economics & Statistics, Akunu S. Meyase den Director, Department of Economics & Statistics, Nagaland, Neidilhou Kreditsu aser Deputy Commissioner, Mokokchung, Ajit Kumar Verma, IAS nungertem angur.

## BJP Mahila Morcha-i Nari Shakti Vandan Adhiniyam pela agizüker



**Dimapur, Rongchii/April 13 (TYO):** Nari Shakti Vandan Adhiniyam Constitution's 106th Amendment Act, 2023 agizükba ya Indian democracy atema temelenshi akaba mera ka lir, aser iba ya ajanga sorkar nung ajaki shilem agitsü lenmang lapoktsür, ta BJP Mahila Morcha-i Hombarnü ashi.

Dimapur nung osangbener tem den jembidang, iba temelenshi yagi Lok Sabha aser State Legislative Assemblies nung tetsür atema menden shilem 33 wazüka yutsür aser yangji Scheduled Castes aser Scheduled Tribes atema menden wazüka yutsüba dena lir, ta BJP Mahila Morcha tir Tsachola Rothrong-i ashi.

Iba act ya ajanga linük nung tematiba telemtetba agidak tetsür tem temeden shidak agütsüdaktsütsü.

Nari Shakti Vandan

Adhiniyam yagi Naga tsür tema legislative governance nung shilem agitsü constitution-i melar, ta lai ashi.

Iba yagi asen state nung tetsür asoshi lenir mapa inyaksü, shilem agitsü aser policy yanglutsü atema temelenshi tasen tenzüktsü.

Stakeholders ajunga dang iba otsüsütsü temelenshi ya tangatetba tajung nung nungittsün ayongzük, kechiaser tetsür nem temeden agütsüba ya party telemsa balala indang tebilemstü masü saka linük ka asoshi tongtipang teinyaksü aser arok tebilemstü lir, ta ashi.

Ibai Nari Shakti adokba kisüng masü ibai India tasen ka akumba lir, kong jala temi anitsü, tetsür temi telemtetba agitetsü, aser anendaktsütsü makokba tashi nung linük mera agiyonga aotsü, ta lai ashi.

## Don Bosco College Kohima nung 9 buba Gratitude Day ayongzük



Dr. Keyiesetuo Stephen Vizo

**Kohima, Rongchii/April 13 (TYO):** Don Bosco College Kohima (DBCK) nung 6th semester züngzük kaketshirtem nem akhum agüja Hombarnü college nung 9 buba Gratitude Day ayongzükba liasü.

Iba sentong nung alakteta jaoker Dr. Keyiesetuo Stephen Vizo, Governing Body Member, Don Bosco College, Kohima ajanga graduates tem den jembidang, nenoki ajak meneta lir ama mebilemstüla, kechiaser angazükba ya tanen makar, ta ashi.

Dr. Vizo-i kaketshirtem dang dangar dak metaloka malitsü aser pei sasa takum liyonga otettsüsa rangloker inyaksü ayongzükba liasü.

Fr. Dr. Tious Varghese, Principal, DBCK ajanga 6th semester students nem tenüngsang agütsü aser college indang motto "Duty and Joy" nung shia aliba ama alitsü ayongzükba liasü.

Tesayurtem tenüng nung Dr.

Lanukumla Ao, Asst. Prof. Dept of History ajanga jembidang 6th semester students temi tesüba küm asem metettsü tejangraba nung aliba asoshi tenüngsang agüja liasü.

Takok ya grades nung masü yimya nung asadangteter, ta ashi aser alima dang temeim aser ochi sayutsü ayongzükba liasü.

6th Semester züngzük kaketshir tenüng nung Tühafi Sharu (6th Semester, Dept. Of Botany) ajanga küm asem azüngba mapang memetet akseta aruba kibong ka ama akumba indang lemsatetpa liasü.

Tesayur temi kaketshir indang sempet ulushitsüba aser timtem mapang ajak nung len aniba atema lai pelaba lemsatetpa liasü.

Tanü onok temang iba tesem yutsür oaka tesendakter kodanga meraksatsü aser iba college onok mulungjang nung teti alitsü ta ashi.

Fr. Mattam Xavier-i anir "Carry Your Candle" sentong agidang kaketshir temi temu milen tsüklok aser department tesayurtem nungi temoatsü agizükba liasü.

Elizabeth (2nd semester, Dept. of English)-ia tepela aser tenüngsang o jembia liasü.

Sentong nung Thangle Kath (4th Semester, Dept. of History) menden liasü aser Phivito Swu (4th Semester, Dept. of History) ajanga Tsüngrem temoatsü meshia sarasadem aser Ravono Chasie (4th semester, Dept. of Psychology)-i melepzüng o jembia liasü.



April 13, 2026 nü New Delhi nung Ato kilonser Narendra Modi 'Nari Shakti Vandan Sammelan' sentong nung adendang tangokba noksa nung angur. Kasa noksa nung Delhi Chief Minister Rekha Gupta aser Union Minister Annpurna Devi nata angur.

### Biometric voting atema SC-i Centre aser EC dang telangzüba meshir

**New Delhi, Rongchii/April 13 (Agencies):** Polling stations nung tangar melen vote agütsütepba aser tim masüba mapatem benshiba nokdangtsü atema temeyong aser nükjang-based biometric identification amshitsü atema Supreme Court nem temepishiba agüja lir, ajioda court-i iba temepishiba ken oji angadangtsü melungogo.

Chief Justice Surya Kant aser Justice Joymalya Bagchi nati akümba bench-i Centre

sorkar, Election Commission of India aser state sorkartem dang iba temepishiba dak sendakba nung telangzüba agüjang, ta metetdaksüogo.

Ajisüaka Supreme Court-i, tang tagidak assembly elections nungbo ibaji mapa küma meinyaktetsü, ta metetdaksü.

"Iba inyakyimji (biometric) taruba Lok Sabha election aser state assembly elections nung benoktsü atema asadangtsü," ta bench-i metetdaksü.

Advocate Ashwini Kumar

Upadhyay-i benokba temepishiba nungji yamai shia lir, proxy vote agütsüba aser duplicate voting ama tim masüba mapatem nokdangtsü atema polling stations nung vote agütsütsü atema biometric verification systems amshitsüla.

Kasa temepishiba nungjisa, "Sübokrem, taila maitsü amshiba, duplicate voting aser asürtem indang vote agütsüba ajanga maneni election inyakyim akhümket raksatsür," ta shia lir.

### Bihar nungi tebur chanu 163 Madhya Pradesh nung kümzük

**Bhopal, April 13 (Agencies):** Bihar nungi ozüing alema tebur chanu 163 Maharashtra-i anir aoba mapang nung Madhya Pradesh kübok Katni district nung railway police-i kümzükogo, ta ketdangsertemi metetdaksü.

Teburtemji arrshi küm 6 nungi 13 tsüingdapurtem liasü.

Maharashtra kübok Latur nung mapa tasak inyadkatsütsü atema tanurtemji Bihar nungi train ajanga anir aoba mapang nung Railway Protection Force aser GRP nati kümzük.

Child Welfare Committee nungi osang ka anguba nung ajemdaker Honibar ayaterm mapang nung police-i tanurtemji kümzük, ta ketdangsertemi metetdaksü.

Tanurtem shibelenba dak sendakba nung Railway Protection Force (RPF) aser Government Railway Police

(GRP)-i tain 8 puogo. Parnok ket nung tickets aser documents peria maliasü.

Patna-Purna Express train nung toudak mapang nung Katni railway station nung police-i parnok apu aser tanurtemji kümzük.

Mezüng bushisüngdangba ajanga, tanurtemji Bihar kübok Araria region nungi Maharashtra kübok Latur-i anir aotsü tebilemba liasü ta jangjaogo, ta RPF Katni inspector Virendra Singh-i osangbenertem nem metetdaksü.

Singh-isa, "GRP-i Bharatiya Nyaya Sanhita (BNS) kübok Arrla 143(4) (arrshi küm 18 ser tekübok tanurtem ozüing alema shibelenba aibelen) nung ajemdaker tain 8 anema ken o benokogo. Parnok tipronglaji Bihar kübok district balala nungi lir," ta metetdaksü.

Tanur aika ozüing alema

shibelenba osang ka Child Welfare Committee (CWC)-i angazüka liasü, iba sülen parnoki police nem kasa osangji metetdaksü.

Honibar aonung security sepaitemi Katni railway station kübok platform number 5 nung express train arubaji ataa liasü, aser train anenba mapang nung coach ajak mita aoba mapang tanurtemji angu.

Amongnü anepdang züingia tashi nung ang tanur ajakji kümzük anir ao, ta parnoki metetdaksü.

Child Protection Officer Manish Tiwari-i, ketdangsertemi tanurtemji kümzükba sülen tanurtem nem counselling agütsüdar aser tsüraburtem den tongtepratepa osang metetpela tenzükogo, ta metetdaksü.

Tanurtemji kar Katni nung aser kar Jabalpur nung child protection units-i anepaludar.

### Taküm India nung tzüinglu 'average' dang nungi tajemba arutsü: IMD

**New Delhi, April 13 (Agencies):** Taküm India nung tzüingluruwa mongpu mapang nung tzüinglu 'average' dang nungi tajemba/ishiba arutsü, aser ibaji tesüiba küm asem tsüingda tang tajemba arur asütsü, ta Hombarnü ketdangsertemi metetdaksü.

Tang Iran nung rara ajanga Asia nung rongsenkettzüng tulutiba linüktem rongnung tasembuba, India nung rongsenkettzüng-a kongshir lia ano tzüingluruwa mongpu nung tzüinglu ajema arura ibaji ajanga aluyimba kongshitsüa akok ta tebilemstü akar.

Küm shia India nung tzüingluruwa mongpu ya June 1 anogo meta Kerala state nung tenzüker aser iba mongpu ya September ita tomlen tashi nung tembanger, ta osangbenertem senden ka nung Ministry of Earth Sciences secretary, M. Ravichandran-i metetdaksü.

India Meteorological Department (IMD)-i, ita pezü mongpu nung tzüinglu 'normal' arubaji shilem 96 nungi shilem 104 tashi lir ta rateter.

India Meteorological Department Director-General,

Mrutyunjay Mohapatra-i, "Tang tashi meiti aliba 'La Nina' ya 'neutral' küma melenshidar. Ajisüaka June sülenbo El Nino kümteetsü," ta metetdaksü.

Tesüiba mapangtem nung El Nino kümtem teimbaka nung India nung tzüinglu average dang nungi tajemba arua liasü, aser khenkhenbo tsüingsarusa ajanga alu nung aonsotsü aika raksakja liasü, ibayongji ketdangsertemi alu nungi züsentetbatem bendang linüktem dangi ajemer yoktsü ataktetja liasü.

Mohapatra-i, "Ajisüaka tzüingluruwa mongpu tatembanglenbo Indian Ocean Dipole (IOD) jenjang tajungba akümtsü aser ibaji ajanga mongpu tensa ajungtsü," ta metetdaksü.

IOD ya tsüingsang yimya ka lir, aser ibaji anüolen tsütsü Indian Ocean aser anüdoklen tsütsü Indian Ocean nung tzüiyim-ma nung temperature ajanga bendanger.

Anüolen tsütsü Indian Ocean nung normal dang nungi tzü talemba asüba ajanga IOD jenjang tajungba küma India nung tzüingluruwa mongpu jungdaksür.

### Mathura nung rong lendong nung asür 15 jungogo



Suresh Chandra Rawat, SP (Rural), Mathura

**New Delhi, April 13 (Agencies):** Anogo ishika tejaklen Mathura district kübok Kesi Ghat anasa Yamuna ayong nung temeshi ainlen jajarterm rong ka nung toudak mapang rongji meküpba lendong nung asürtem 15 jungogo.

Hombarnü ano tasümgang ana tzü telung nungi agitetogo, ta ketdangsertemi metetdaksü.

Superintendent of Police (Rural), Suresh Chandra Rawat-i, tasümgang maneni bushiba mapang nung Hombarnü tetsür ka tasümgang Bangali Ghat anasa angu aser tebur ka tasümgang Devaraha Baba Ghat nung angu, ta metetdaksü.

Hokolbarnü iba lendong ataloktsü anasa temeshi ainlen jajartermji rong nung mener tekülem ken tena liasü.

Joko iba lendong nung asür, Pankaj Malhotra tasümgang dang anünga lir.

"Jagraon nung alir Malhotra tasümgang dak alaka tang tashi

nung samaba nisungtem tasümgang ajak nguogo. Hokolbarnü atalokba lendong nungi Malhotra-a densema liasü," ta Rawat-isa metetdaksü.

Malhotra ya Himachal Pradesh nung aliba steel company ka nung manager teinyadk liasü.

Amongnü iba lendong nung asür tasümgang ana nguteta liasü.

Rawat-i, National Disaster Response Force (NDRF) team 8 aser State Disaster Response Force (SDRF) team ana den Provincial Armed Constabulary (PAC) nungi tzü telungi air nisung troki tasümgangtemji bushia arudar, ta metetdaksü.

Rong nungji temeshi ainlen jajar nisung 20 dak tali mena liasü aser parnok teimbaka Punjab nungi liasü. Rong jagi tzüma nung apongdeka aliba asem (drum) ka dak atsükba sülen rongji meküpoka iba lendong atalok.



April 13, 2026 nü Uttar Pradesh kübok Gautam Buddh Nagar district nung factory nung inyakerteri taa tujang, ta longkak aitba mapang police bike ka rongdoktsüdang tangokba noksa nung angur.



## TIR YIMYIM YIMOBILEM (EDITRIAL)

DIMAPUR TUESDAY, APRIL (RONGCHII) 14, 2026

### Totzü mengura koda ?

**U**S aser Israel nati Iran amakba ajanga alima tesem aika nung gari nung atsükba totzü aser soruchiokba gas nung jenjang tuadokogo aser asenok Nagaland nung dena gas-bo akhi ama talubosabo mangur. Ajisüaka, tang tashi asenokbo gari totzü agibo manüangi agidagi, ibaji India-i Iran aser Russia na prongla den tamajung metentepi putepa aliba ajanga Iran aser Russia na prongla pei pei raraba tongpang nung nokdaka liaka, India dangbo totzü alia bener aotsü melaba ajanga lir. Ajisüaka, shisabolutsükaji, US-Israel aser Iran na tsüngda rara ya manenra, Strait of Hormus ajanga gas aser totzü bener aoertem shinga bener moutettsüsa tensa tia tamajungba kati yakta aitsü. Tangbo Strait of Hormus ya Iran ket nung lir, anungji rong tulu nung gas aser totzü bener iba tesem ajangtsübaji Iran temelaba nüngdaker. America nungeri maginübaji ibaji lir. Iba jagi tang Pakistan-i la tiyongi ir Iran aser US na tsüngda yimjung yanglutsü asoshi jatepba senden nung US-i Iran dang akangba onük kaji, Strait of Hormus ajangtsü asoshi shinga kin a nokdanga mayutsüba onük liasü, saka Iran-i aji memulung, anungji, joko, tangbo US-ia Iran den kasasa toktepa Strait of Hormus nungji tashi amshi tenzüksü metetdakja lir. Tetezü, tang Iran temelaba magii kin shinga Strait of Hormus majangtetba ama, US temelaba magii Strait of Hormus majangtettsü, idangji US aser Iran na raraba tongpang tesashiba akümtsü. Tangbo, parnok anüng o ali na nung rarar, saka kopi melii US o Iran na tzü nung raratsü. Idangji, Persion Gulf nung aliba limatem, Iraq, Saudi Arabia, Kuwait aser UAE ama nungi totzü aser gas bener marutettsü. Idangji asenoka gas aser totzü agi anüng tenzüksü. Aji oda, gas mangu aküm nungji nisungtemi electric aser süng amshia soruchioktsü aser gari totzüa, tangubo angutsüa akok, saka sen kanga tasak aküm nungji, nisung aikati pei gari bener senzütsü makoktsü aser bus nung senzüba jenjanga tua adoktsü. Aji oda, gari totzü nung sen atu nungji gari agi bener aruba chiyongtsü aser oset ajak nung jenjang tua adoktsü. Iba ama mapangji ka asenok jakdang arudar ta bilema asenoka renema atatsüla. Atangji, aikati totzü aser gas alioka ayutsüa akok, saka alioka yudi asüyonga anogo kwika atema alioka yutettsü ? Anungji, gas aser totzü mangutsü tsüba alioka ayuba jagi asen nem kecha balaka tajangzük aser anisüngzük magütsütsü ? Anungji, tang asenoki shisabolua bilemba amaji, gas aser totzü agi meperi asenok timtemtsüsa kümra, iba ama mapang nungji asenoka komaka ali nung shitak asütsü ta asenok kolok nung bilema alitsübaji kanga tongtibang kümogo. Taoba mapang, asenoki Covid-19 tashidak wara ajuruba mapanga, asenok kongia moutettsüsa tensa tia ka ajurudang, nisung aikati atsü yanglua aonsutsü lu ayimtsü tenzük aser ano karibo kidang peii inyaktetba mapatem inyaka among. Tanübo, Covid wara süitema orr külena Covid mapang nung inyakba mapatem to pei mapa kümmer maneni inyakba angur. Iba amaji, asenoka gas aser totzü manguba agi timtemtsüsa kümra akok tashi asenok tetsüng agidang jaja tenzüksüla aser chiyongtsü aser osettsüset nung jenjang atubaji temoatsü kümmer, alia machitsüsa peisasa pei akok aonsutsü lu, tsük lu aser süngjang lu ayim tenzüksüla. Aji oda, totzü nung jenjang atuba agi gari bener senzusenpongtsü tasak kümra, ibaji temoatsü kümdaktsür tetsüng agi senzüa alu ayimtsü aser takokeribo kidang mener pei akok mapa inyak tenzüksüla. Idangji, asenoki tanü totzü nung sen endokba meindoki kümzüksü aser tetsüng agi senzüba ajanga temanga tajungba akümtsü aser asen tsüki aser alu nung züsentetba chiyongtsü tajungtem achiba agi sen kümzükba dang masü saka tashidak nungia kümzüksü. Aji oda, asenoki alu mapaji inyaka-inyakabo asen achitsü asoshi dang masü saka tayoka ayoktsüsa asenoki züsentettsü. Atangji, gari nung senzüba ajanga mapa melamelaa atemer, ajisüaka asenokbo mapa melaa atemba o totzü nung sen endokba naji meputeper, iba jagi teti asenoki aaba agi asen meperi timatemer. Atangji, totzü manguba agi asenok ajak senteptsütepia tetsüng agi dang ora, iba jagi, metetmeteta, asen alidak tzü moponga tajungba akümtsü.

## OLEMSABANG

### JAKREPAYONG; AZUKARUNUNGI AYATAI (Asangsang nung ajangshiba nungi )

~ Dr. Talimoa

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

Anepdang züngia anü sangwa ano alima nung meyaloktsüdang tenem nungi ozü sangnu asatepba temenungratsü ola agi anogoshia yimdaklir tem sakdaktsü. Iba yim ya tenem tulu ana tsüngda wapetsa ka nung liasu. Yim tepur ajungbaji tebang agi rasa meshiteti liasu. Bendanglir tem-i yim doktsür aodang kari nungi tejak meyipa yimdong ajak meyipshia repranga menungraseta pila ao. Yim kolak len tenem ana nungi ayongnu ana ajuruteper yongti ka kuma yimdong ajanga yima alua liasü. Iba ayong dang Jakrep Yong ta aja. Tenem nungi pokteta ayimba ayong tzüji temokong aser tenüdangtsü ama merüka liasü. Jakrep Yong yimdaklir temi tsüngrem ama bilem. Kechiaser, iba ayong ajanga parnok nungdak ajak peri. Parnok-i iba ayong kanga akum tsübu anungji, teti merüka ayu. Janarüja tamajung kecha ayong nem magütsü. Yimdaklirtem tzü temerük talubosa angu nung kanga merükmejua nisong ajak semsasemsa liasü. Iba dak alaka yimdak tsünüsembongtsü kanga junga adok, sungdonglidong, narotem teronem menema tepur junga liasu.

Yimten arogo ajak tesendaktep tajung nung yimdaklirtem longjema pelatepa ali. Tzü mepung tajung asü nungji warashira aser tashidak tamajung agi asüba kangadang ajema liasü. Yimdaklirtemi aki alu mapa kanga meranga inyak. Tachitsü süngjanglijang aser süngolio aonsutsü agi parnok tepok sunger ano bendang lima nungia tzümartem arua alizüka bener ao. Aji agi parnok rongsenkettsüng nung tanga yim den temaba jenjang nung litet. Yimdaklirtemi yimten arogo kanga nongita yari. Talisa arogo dangi temoatsü, tepela, tenungsang tenla molungsoa tenlaba ajanga arogo jenjang tajung nung liasu. Arogo nung pastor kiyimlanu tajung ka Teyanglur Tsüngrem aküm tsüba, ajemalua ajak den sako litetba jakla bener aliba ajanga yimdaklirtemi arogo nung raktepa tenzüksü jangra. Yim azükaro nung ali nung arogo nung toklang tenzükertem kecha agia anüngaponga maka, jamgratema teti tepela nung ali. Yimertem rongsenkar jenti ali nung yimtsüng süaka parnok jila den kecha tebandang mali osettsüset tajung alia amshi.

Saka mapang ka yamai atalok! India lima tesem ka nungi company tulu ka ajanga yimten dangi shiti ka aru. iba shiti ajanga yimten yimsüsür den parnoki arua ajurutepea terenlok bener arutsü tongtipang onük kar jembinüa asüngdang. Yimsüsürtem mensem anaben, asemben tashi mena koda asütsü ta lemsatet. Kari ashi, oda, asen yimtsünga tanga jila ama terenlok angutsü lenmang lira parnok agizükdi. Karibo iba ama putu tensa tamajung mapang ka jila tulu nungi memetetba nebu jaoka mensem akatsü kanga arendaka bilem. Tatsü talang ajak asadanga jembiteper tatem nung bendanger yimdaki arutsü temelaba agutsütsü renem.

Hupta ana lir kulen shiti nung asüngdangba ama anogo tajung agiteta parnoki bendanglen alir tzümar den ajurutepea mensem tajung amen. Tzümartem talongtsü kari tajung nung süoshi tajung semer parnok den par yimer jila nung alir kar densema aru. Tarurtemi o yamai tenzük. "onoki ner yimdak ali rongsen jenti aliba osang agitepa mapang talangka aruogo, nenoki ner lushu ya onok nem kum ana asoshi sen meyong agutsüra nenok senma nung mejangtsü aser kibong shia takar akumtsü" ta o tanang jembia tenzük. Kodanga kecha bilema maliba onük ka ajungben bener aru nung yimsüsürtem kati ka dak repranga pangatep. Yimsüsürtem ola tila agi nemnemtepa jembiteper, yamai langzü; "nenok dang onoki hai, ma ashitsu asoshi yimmungdang ka ajanga dang telemtetba agutsütettsü." Iba o angashia tzümartemi taoba mapang parnoki tesem kar nung sen agutsüba kuli kaketter sayu aser maneni parnok telemtetba tajung kati arutsü mepishi.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

# Tasen Lai meyipsang nungtem nung 'Tyndale Trail' semzük



Anne Hayward-i William Tyndale indang kürakyanglu den külemi tangokba noksa nung angur.

**April 13, 2026:** English oshi nung Tasen Lai adokba sülen taküm küm 500 ajunger, aser iba nungtem nung Laishiba meyipsang, William Tyndale taküm otsü nung ajemdaker southern England nung "Tyndale Trail" lenmang semzükogo.

Tyndale Trail ji kaketzüür, Anne Hayward-i apiteta yanglu. Iba lenmangji Gloucestershire nungi Bristol tashi nung Aso 16buba mapang nung Lai meyipzüksang Tyndale taküm den sendaktepa lir. Iba lenmang nung jajartemi mile 28 talang lenmangji anogo ananü tashi nung ang jajatsü matsü.

Iba lenmang nungji William Tyndale lanuwa mapang nungi tenzüka pa indang ministry dak sendakba tesem aika lir.

Anne Hayward-i, yakümba la temeshi ainlen jajaba mapang nung Tyndale nungtem nung lenmang ka semzüksü lai apiteta liasü, ta ashi.

"2024 küm September ita nung ni maongka ngua Gloucester yimti nungi Bristol yimti tashi temeshi ainlen jajaba liasü, aser ibaji Laishiba meyipsang William Tyndale taküm dak sendakba tesemtem semdangtsü asoshi liasü," ta lai ashi.

Iba lenmang nungji Little

Sodbury Manor densema lir, iba nungji Tyndale-i küm ana tashi tutor inyaka liasü.

Iba lenmang nung jajartemi Sodbury, Iron Acton, North Nibley aser central Bristol adena jajatsü. Lenmang nungjiisa Tyndale Baptist Arogo Tenla ki aser Tyndale indang kürakyanglu lir.

"Tyndale-i Tasen Lai meyipba sülen küm 500 ajungba nungtem nung ni pa taküm dak sendakba lenmang ka apiteta liasü," ta lai metetdaksü.

William Tyndale ya 1494 küm aso aser 1536 küm asü. Pai Greek oshi nungi English oshi agi Laishiba meyipzükka liasü, aser ibaji Laishiba puti otsü nung tetenzükdak ka liasü.

Tyndale-i mezüing English oshi nung Tasen Lai meyipzükba ajanga tesülen King James Version densema version balala nung Laishiba meyipsü atema tamendakdak yangluja liasü.

Pa mapatem ajanga pa kangshia meindoka liasü, tesülen apu aser tepseta liasü.

Tanübo pa ya Laishir ka dang masü saka oshi nung mongin ka ama züngshir.

# Pastor Vineet Vincent Pereira anema benokba ken o SC-i thinentüsügo

**April 13, 2026:** Uttar Pradesh nung pastor kati tanga yimsü amangertem temelung yirutsüogo, ta pa nem tai tonglokja ken o ka benoka liasü, ajisüaka Supreme Court-i iba ken oji thinentüsügo, ta osang ka ajanga metetdaksü.

April 10, 2026 nü Supreme Court-i Varanasi yimti nung aliba Khristan putir Vineet Vincent Pereira anema benoka aliba ken oji thinentüsügo aser state sorkar dang iba dak sendakba nung telangzüba agüjang, ta tuyuogo.

Justices- Vikram Nath aser Sandeep Mehta nati akümba bench-i, iba ken o metembang tashi iba ken o thinenja atar, ta metetdaksü.

April 13 nü osangbenertem

den jembidang pastor Pereira-i, "Court obendang ya ni asoshi anisüngzük tuluka lir. Ni anema tai tonglokja alibaji khenyongi tiyazü nung tongloktsüba lir ta court-i oshidang agütsütsü, ta ni judiciary dak tamang akar," ta metetdaksü.

March 18 nü Uttar Pradesh nung aliba Allahabad High Court-i Pereira dang iba ken o akatsü atema court matsüingdangi arung, ta tuuba sülen pai iba tetuyubaji anema Supreme Court nung temepishiba ken o ka agüja liasü.


March 18 nüji Allahabad High Court-i, India ya secular linük ka lir, aser yangi yimsü balala amangertem ajak lir, anungji pei yimsüji chichiba

yimsü, ta jembibaji ajanga tanga yimsü amangertem temelung yirutsür, ta metetdaksa liasü.

2018 küm November 15 nüa Hindu Yuva Vahini (youth brigade) züngsemtemi Mau district nung par ki mita aoba sülen pa pua liasü.

India nung nütsüing teimba aliba state Uttar Pradesh nung 2021 küm Uttar Pradesh Prohibition of Unlawful Conversion of Religion Act agizüka liasü aser 2024 küm iba ozüing ano tesashiba küma yanglushia agizükogo.

Iba ozüing agizükba sülen Uttar Pradesh nung Khristan putirtem aser pastor tem densema Khristan 500 dak tali puogo.



Amritsar, April 13, 2026: Jallianwala Bagh tatalokba sülen küm 107 ajungba anogomong nung nisungtemi Jallianwala Bagh tesem semdangba noksa nung angur. 1919 küm iba anogo nung India nungertemi Rowlatt Act anema longkak aitba mapang nung British nunger sepaitemi noklang aika khaseta liasü.

# ANOGO ABEN TSÜNGREM DEN

## Mokok achi

*Asenoki asen medemer mejashidaksüli mesüra mokokaji melitaksüli, mesüra tiyak mesangli.*  
Gal. 5: 26.

Tenyar Pauli pa temeim ken tulu nung (I Kor. 13) Khristan temeimji tenükmerem masü ta bilemtetdaksür. Iba temeim yagi tangar ajungba nung tenük memeremer.

Tsüngremi ajak nem ali rongsen moatsür. Pai asen kiyongera moatsür. Aseni asen kiyonger oset alizüksü akok, melenteptsüa akok, senmang amangtsü akok, mesüra Tsüngremi moatsüba lenmang nungi angutsü akok. Asenoki tangar oset tashiyim agi agitsü memerangtsüla. Tsüngremi moatsüba nung temulung süa pelaa alitsü pai aginer aser tangar temoatsü nung pela loktsü pai mulunger.

Mokokachi anema asenoki raratsüla. Tenük meremteptsü kecha kuli mali. Tsüngremi kecha melemsai Pai mulungba ama ajak nem moatsür. Asenok ajaki Yakob den ya shidi: "Nai ne killir taochi ochi sayuba ajak rongnung tilatiba ni asoshi metemsü" (Lipok 32: 10).

Tsüngrem taochiyong dang Khrista nung asenok Pa temoatsütem agir aküm. Pai asenok nem teti tatem maka tekumtet agütsü. Tenük merem nungi pilar Tsüngremi asenok nem aser shirnok asenoki meimer parnok nem temoatsü agütsüba asoshi Pa tenung sangdi.

# MP nung Protestant Pastor, Uttam Barela apu

**April 13, 2026:** Madhya Pradesh state nung police-i Protestant pastor ka puogo aser ano pastor ka tang tebushidak lir.

Tamang agi aneptsür ta shia tribal nisungtem Khristan yimsü dangi meyipdaksüba nung ajemdaker pastor ka puogo aser ka tebushidak, ta police-i metetdaksü.

Guna district kübok Mohanpur Khurd yimtak sarasadem sentong ka agiba sülen nisung kari tashishiba ken o agütsüba nung ajemdaker April 11, 2026 nü police-i Protestant pastor, Uttam Barela apu aser pastor Vikas Barela tang tebushidak, ta police-i metetdaksü.

Pastor anapronglaji Light of Jesus Christ Church nungi lir.

Bajrang Dal telok nung züngsem, Brijesh Bairagi-i tashishiba ken o agütsüba nung ajemdaker police-i pastor Barela apu.

Brijesh Bairagi-i, April 5 nü Easter anogo nung pastor ana jagi sarasadem sentong ka ayongzükka liasü, aser iba sentong nungji Bhil lisopurtem aika densema nisung 400 shi aden, ta metetdaksü.

Paisa, pastor ana jagi sarasademtsüba ajanga parnok taneptsü angutsü ta lokti dang ashiba den külemi medical teyari den külemi senotsü teyaria agütsütsü ta nangzük, ta ashi.

Bairagi-isa, iba dak alia sarasadem sentong nungji lokti chiyungdaksü, aser iba atemaji taküm shiruru tepseta liasü, ta metetdaksü.

"Item ajakji tribal nisungtem Khristan yimsü dangi meyipdaksütsü atema liasü," ta pai tai tongloktsü.

Police-i iba ken o bushisüingdang tenzükingo aser tanüingba pastor kaji tebushidak.

April 13 nü osangbener den jembidang Sagar Catholic Arogo nungi Bishop James Athikalami, "Police-i bushisüingdangba maparen ajak tembangba sülen pastor tem nem tai tongloktsüba nung ochiji onoki tejangja metettsü," ta ashi.

Paisa, Arogoi lokti tenzükingba mapa inyaker aser temeim mapatem inyaker, iba tesem nungji Arogoi sensakertem nem shisaliok aser medical teyari agütsür, ta metetdaksü.

"Item mapa inyakbaji tai rateta agitsüa akok, aser tangartem Khristan yimsü dang meyipdaksütsü atema mesüzükba mapa lir ta ratettsüa akok," ta Athikalami-ashi.

India nung anti conversion ozüing mezüing agizükba state ji Madhya Pradesh lir, iba state nung 1968 küm anti conversion ozüing agizükka liasü.

2021 küm iba ozüing tesashiba yanglua agizükogo. Madhya Pradesh Freedom of Religion Act ta ajaba ozüingji mesüzükba, tashiyim mesüra amokmeren ajanga yimsü meyipdaksüba nokdangtsü atema lir. Iba ozüing kübok khen nung nisung aika yimsü meyipba-a nokdangter.

Tang nütsüing million 72 aliba Madhya Pradesh state nung nütsüing shilem 80 bo Hindu nungertem lir aser Khristantembo shilem 1-a majung.

AO OSHI ANGAZÜKDAK:

TANÜ ANGAZÜKTSÜBA OJANG



Watet

(v) shi rangtetba (cutout a portion of meat by knife)

\* Ak mang awazü dang temesen wateta ayu.

Wati

(n) lokti tulu adenshia benjongtepba (mass celebration)

\* Nagaland ya wati dak tesemang ka kümogo.

OLONG PAITEP # 7473

Grid for Olong Paitep # 7473 with numbers 1-15 in various positions.

TIPLÉN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. \_\_\_\_\_ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. \_\_\_\_\_ kibur - (5)
13. Tebur tembar tsüngda jatepba - (4)

OLONG PAITEP # 7472 TELANGZÜBA

TIPLÉN :

- 2. Pongsen, 5. Lepko, 7. Omen,
8. Maangka, 10. Yangkhu,
12. Senpong, 14. Angu, 15. Raksa,
16. Arameso,

LANGTSÜNGLEN :

- 1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER



United Arab Emirates kübok Hudayriyat Island nung linük 64 nungi nisung 153-i seret 200 taret single banner ka bener metre 100 külemi jajaba atema Guinness World Record ka yangluogo.

Parnok ya sepaitem mesüra saisapongertem masü saka nurses, doctors, aser healthcare workers liasü. Burjeel Games tembangba sentong nung "Our Nation. Our Heartbeat" omen nung ajemdaker iba otsü yangluogo.

Assam HSLC nung specially-abled kaketshir 2-i takok angu



Nurjahan Begum



Nasrin Ahmed

Guwahati, April 13, 2026

(Agencies): Assam kübok Tinsukia district aser Bongaigaon district tem nungi matamabensar kaketshir anati High School Leaving Certificate (HSLC) examination nung takok nguogo.

83rd Margherita Legislative Assembly Constituency nung alir Nurjahan Begum-i HSLC examination results nung 46.9% angu. La ya Pengree Higher Secondary School nung azünger aser Health Care subject nung letter mark angu.

Nurjahan ya Mohammad Abdul Shahid aser Kulsuma Begum na jala lir aser la ya

tsüngtsüker ka lir. Lai la tepen amshia senzür aser iba ajanga school zünga arudang timtem aika ajurua arur.

Itemji liaka lai kanga meranga azünger aser secondary schooling ajangettogo. Ajisüaka lar kinungertemi ashiba agi lar sensaktia ajanga la college mezüngtetsüsa akümtsü.

Parnoki Assam sorkar, local organisations, aser constituency nung educationists dang la yaritsü mepishia metetdaksüogo.

Külen, Bongaigaon district kübok Jogighopa nung tenarong tajak kati HSLC examination

nung distinction ngua takok nguogo.

Balpara Jatiya Vidyalaya in Jogighopa nung azünger Nasrin Ahmed-i 62% nguteta takok nguogo. Nasrin ya hearing & speech-impaired kaketshir ka lir saka lai kanga meranga azünga ajanga takok tajung nguogo.

Nasrin tenu tanutsüla Najnin Ahmed-i ka kanga yaria aru. Najnin yaa tekolok techira lir aser kasa tatidang nung lai 70% ngua takok ngutetogo.

Nasrin ya Anowar Hussain'er jala lir. Pa ya provincialised school nung science tesayur inyaker.

Meghalaya CM-i tetsürtem asoshi shelter home ka lapoktsü

Shillong, April 13, 2026

(Agencies): Meghalaya Chief Minister Conrad K Sangma-i tetsürtem asoshi shelter home ka lapoktsüogo aser Chief Minister's Special Development Fund (CMSDF) nungi Rs 25 lakh agütsüba metetdaksü.

Iba shelter home nung teyarir maliba tetsürtem anioka lidaktsütsü aser anepalutsü. Iba home ya Ka Nabon tenüng nung jaloktsü. Khasi Hills nung la ya mezüngbuba Christian tetsür liasü ta züngshir.

"Iba home nung teimla aser

kübok Jingiaseng Kynthei Shillong Ri-Lum Presbytery ajanga yanglu.

Iba shelter home nung teyarir maliba tetsürtem anioka lidaktsütsü aser anepalutsü.

Iba home ya Ka Nabon tenüng nung jaloktsü. Khasi Hills nung la ya mezüngbuba Christian tetsür liasü ta züngshir.

"Iba home nung teimla aser

aria bilemba angudak ka dang masü saka teyarir maliba tetsürtem pelashishia agizükdak aser anepaludak ka asütsü" ta Chief Minister Conrad-i ashi.

CM Conrad-isa Social Welfare Department kübok Child Care Institutions nungi takok tajung anguba kaketshir 41 den ajurutepa senpettem agüja liasü.

Assam Rifles-i Moreh nung World War II veteran tushi



Imphal, April 13, 2026

(Agencies): Assam Rifles-i April 12, 2026 nü Manipur nung arishi küm 104 tain Rifleman (Retd.) Shatri Dhan Thapa nem tetushi agütsüogo.

Tengnoupal district kübok Moreh nung Assam Rifles

ketdangsürtemi veteran Thapa semdanga liasü. Pa ya 4 Assam Rifles nung inyaka liasü.

Rifleman Thapa ya Second World War nung veteran ka lir aser pa taküm ajanga Assam Rifles tasü aitba, bendanga

agütsüba aser tenangzükba tulu agiba kuli agütsür.

Assam Rifles ajak tenüng nung ketdangsürtemi Rifleman Thapa nem tenüngsang tulu agütsü aser linük tenzükba nung shilem tajung agiba atema pelaba metetdaksü.

# Australia nung tang mezüngbuba tetsür ka army chief akümtsü



**Canberra, Rongchii/April 13 (Agencies):** Australia nung küm 125 sülen tang mezüngbuba army ya tetsür kati anitsü ta sangdongogo. Linük defence force nung lenirtem melenshiba mapang tang iba jenjang ya agiogo.

Lieutenant General Susan Coyle, shiba tang chief of joint capabilities lir, la July ita chief of army akümtsü ta sorkari Hombarnü sangdong ka ajanga metetdaksü. Lai Lieutenant General Simon Stuart melentsü, shibai iba mapa 2022 küm July

ita agizüka liasü. Coyle ya military nung küm lir shi inyaker aser iba mapang lai tongtibang mapa aika benogo, kong Afghanistan aser Middle East nung operation balala len aniba densema lir.

Australia nung military-i tetsür officer tem timba kümdaksütsü merangba mapang tang la shimogo.

"Australia Army tenzüker küm 125buba nung tang mezüngbuba July ita tetsür ka chief of army akümtsü," ta Ato Kilonser Anthony

Albanese-i ashi. Defence Minister Richard Marles-i Coyle shimba ya otsütsütsü mapang ka ta shiogo.

"Susan-i iba alizüng tongtetba ya tanü Australia Defence Force nung tenzüka aliba tetsürtem aser tarutsü nung Australian Defence Force tenzüksü tebilemba alirtem atema kanga tongtibang asütsü," ta pai ashi.

Australia army ta melenshiba mapang ka lir aser parnoki long-range firepower, drone aser tanga modern combat tools tem aika bendenba mapang lir.

Australian defence forces nung tetsürtem shilem 21 lir aser shilem 18.5 lenir tejentem lir. ADF-i 2030 küm tashi nungbo tetsürtem shilem 25 nembo shilem agidaksütsü nükjidong yur lir.

Sorkari Hombarnü Vice Admiral Mark Hammond, shiba tang chief of the navy pa Admiral David Johnston melena ADF tekolak asütsü shimogo.

Tang deputy chief of the navy, Rear Admiral Matthew Buckley-i Hammond melentsü aser pa branch tekolak akümtsü.

# Hungary election: Péter Magyar-i Orbán tsükdaksüogo

**Budapest, Rongchii/April 13 (Agencies):** Viktor Orbán-i Hungary küm 16 tashi yimsü asüba sülen pa arishi küm 45 tain taoba mapang party nung külem tenzüker Péter Magyar-i tsükdaksüogo.

"Asenoki koktetogo," ta Péter Magyar-i parnok pusemertem dang ashi. "Asenok ajak longjemer Hungarian regime atsiungtokogo," ta paisa shisem.

Vote shilem 98 azüngba sülen Tisza party-i menden 138 akoktsü jangjaogo aser Orbán-i aniba party-i menden 55 aser far-right Our Homeland-i menden trok akoktsü.

liasü. "Democratic Hungary puti otsü nung iba amai nisung paika yagi vote agütsüdanga mali aser party ka kijai yamai menden aika koka mali," ta pai Deobar aonung ashi. Iba election nung voter shilem 79.5-i shilem agia liasü.

Orbán-i election pezü atonga koka linük yimsüsüa aruogo, saka minute ishika tsüngda iba ya tembanga liasü.

Pro-Magyar pusemertem result yongyatepa ata aliba mapang Tisza lenir yagi Facebook ajanga takok osang lemsatepa liasü. "Viktor Orbán-i tang kü dangi call süa asenok takok asoshi tenüngsang agütsüogo," ta Magyar-i ashi.

Iba osang agütsüba mapang tashi nung vote shilem 30 dang zünger liasü asünung ken o mejangjai liasü, ajisüaka mapang tatsüka lir Orbán-i conference centre ka nung nokdaka parnok tamakok anguba osang agütsü.

Magyar-i, shisaluyim, health nung temelenshi bener arutsü, ochi mashi inyakyim anema nokdaksü aser judiciary independence asüngsashitsü tenangzükba agütsüogo.

Temzüng ozüng nung item temelenshi bener arutsü atema pai two-thirds majority nüngdaker koba Hungarian parliament nung menden 199 aser yimitem sema senzüa ochi mashi anema nokdaksü Tatembangbuba result mesangdong saka Tisza-i aniba nungertem anidena senzüa party-i menden 138 akoktsü lir.

Iba takok ajanga Magyar nem Orbán indang domestic policy tem melenshitsu atema dang temelaba agütsütsüba dang masü saka iba ajanga Hungary alima kintem den tesendaktep yanglushitsü.

Orbán ya US tir Donald Trump aser Russia tir Vladimir Putin naprongla den kanga junga sendaktepa lir aser pa ya EU aser Ukraine asoshi tetsükdaksü tulu ka liasü.

Kasa mapang nung Magyar ya Russia nungi pilar EU aser Ukraine na den tesendaktep ayutsü asoshi jangraba nisung ka lir.

# Nigeria nung tayimtsü amshia amakdang nisung 100 dak tema asü



**Abuja, Rongchii/April 13 (Agencies):** Honibarnü market ka nung tayimtsü amshia amakdang civilian aika tepsetba sülen bushisüngdang tenzükoogo ta Nigerian Air Force-i ashir.

Iba lendong ya Borno aser Yobe states tsüngta arütsü nung atalok, kong mitkar tayimtsü tem Islamist telungpur bushia liasü. Nisung 100 dak tema takum samaogo ta yangji alir aser Amnesty International-i ashir.

Ketdangsür temi tang tashi iba lendong nung asür tejangja osang magütsü, saka Yobe state nung aliba mozüki kar nung yirur alirtem anepalutar ta ashir.

Nigerian Air Force-i sangdong ka nung, iba tai tonglokja aliba kuli tejangja bushitetsü asoshi telok ka iba tesemi yokogo, ta ashi.

Nigeria indang mitkari Deobarnü sangdong ka nung amakba jangjatsüogo aser parnoki Jilli nung tesem ka nung tenük yoker amak, koba

kiralongrar senzüba corridor ka aser Islamic State West Africa Province aser parnok den yariteper tem adenshiba tesem ka ta mapang talangka nungi jangjateter liasü, ta ashi.

Ibai kanga kumdanga, kanga junga osang agitepa sentong yanglur itdangiter teyari nung inyak aser yim toker aliba Jilli anasa kiralongrar adenshiba aser logistics hub tejangja ka nung tayimtsü amshia mezüngmezünga takok ngua amak ta ashi.

Iba mapang kiralongrar aika tepset ta ashi saka civilian asüba indangbo meshisem.

Iba tesem nung nisung 200 jungnüa tepseta alitsü südi, ta Yobe kübok Geidam district nung councilor Lawan Zanna Nur Geidam, yangji alir nisung asem aser international humanitarian agency nungi ketdangsür kati ashi.

Amnesty International-ia X nung nisung 100 dak tema asüba

lir aser nisung 35 kanga sashia yiru ta ashi.

"Onok ket nung noksa tem lir aser yangji tanurtem dena lir. Yangji aliba nüburttem den onoki osang agiteper aser mozüki den jembiogo. Asü-amar ketdangsür aser lendong ajurur alirtem den onoki jembiogo," ta Amnesty International indang Nigeria director Isa Sanusi-i ashi.

Ajisiüaka yangji councillor inyaker Zanna Nur Geidam-ibo asü-amar aser yirur alirtem ajak agi 200 shi asütsü, ta ashi.

Aika anasa Geidam aser Maiduguri nung aliba mozüki tem bushia anir ao, aser yirur alir nisung ti Deobarnü asü, ta pai ashi.

"Nisung aika asüba indang jembir, saka tejangja ashitsü tasak," ta pai ashi.

Nigeria north-east tsütsü küm ishika tsüngta mitkar temi tayimtsü amshia Islamist telungpur anema amakdang aibelena civilian tem tepsetba lir.

**ANGO CHANU (FINGERLINGS) ANGÜTSÜ**

1. Common carp/grass carp per kg ` 800/-
2. Common/Grass carp/Row/Mirga/Katla per kg ` 700/-
3. Magor per piece ` 5/-

Oxygen packaging nung ango tapu ajakji Longmenden Farming Aolijen Sector, Ungma nung April 17 nungi angutsu.

~ **Contact : 9862747886**

**NIAM**

**C. C. S. National Institute of Agricultural Marketing**  
(A Government of India Autonomous Organization under Ministry of Agriculture & Farmers Welfare, Bambaala, Kota Road, Jaipur-302033 Rajasthan)

**ADMISSION LAPOKA LIR 2026-28**

Post Graduate Diploma in Management  
 Agri-Business Management

Last date April 20, 2026 tashi atsülangogo

**APPLY NOW !**

**CONTACT US:**  
**(ADMISSION DAK SENDAKBA TONGTEPRATEPTSÜATEMA)**

- 0141-2795111 (Program related)
- 0141-2795142, 0141-2795126 (Admission)
- 0141-2795143 (Examination)
- 0141-2795123 (Application form and technical)

Email ID - info.abm@ccsniam.ac.in

For More Information Visit: [www.ccsniam.gov.in](http://www.ccsniam.gov.in)

CBC 01375/11/0001/2627

## Ghana nungger football asayar Dominic Frimpong tepsetogo



**Rongchii/April 13, 2026 (Agencies):** Berekum Chelsea team Ghana Premier League nung away asaya ka asayar meyipa aoba mapang parnok mena aliba bus auertemi amakba sülen Ghana nungger football asayar Dominic Frimpong tepsetogo.

Team ya Samreboi nung Samartex den asayaba sülen kidangi meyipa oya aliba

mapang Goaso aser Bibiani na tsüingda maka liasü.

"Samreboi nungi Berekum-i meyipa oya aliba mapang onok team bus ya prangbong aser hadir balala bener auer telok kati amak, shirnoki onok meyoktsü atema lenmang nokdanga liasü," ta club-i Hombarnü sangdong ka ajanga metetdaksü.

"Onok bus anisangi bus meyiper aotsü merangba

mapang mask semer aliba aurtemi prangbong aser assault rifle amshia onok indang bus dak injang akha tenzük. Asayar aser staff tem lenmang tezülени jena oa süngsembok nung atsükoka liasü," ta kasa sangdong ajanga metetdaksü.

Iba sülen Ghanaian FA-i arishi küm 20 tain Frimpong asüba indang osang metetdakja liasü.

"Berekum Chelsea Football Club nungi asayar Dominic Frimpong asüba indang taoksatsü osang GFA-i agizüka liasü," ta FA-i sangdong ka ajanga metetdaksü.

"Iba tatalokba ya Berekum Chelsea atema dang masü saka Ghana football atema kanga takoksa tulu lir. Dominic ya sempet tajung aketba lanur asayar ka liasü, shibai football tejangraba tulu nung bendanga agüja asayaogo, koba ajanga league tanüla sayur," ta kasa sangdong ajanga metetdaksü.

FA-isa, parnoki domestic asayamungtem atema senzuisenpongba club tem asoshi security akangshitsütsü, ta shiogo.

Iba amala mesükba tatalokba ka nung 2023 küm Samartex den asayaba sülen Legon Cities' team bus-a amak, saka shinga meyirui liasü.

## Tetsür T20 World Cup nung senpet USD million 8.8 agütsütsü

**Rongchii/April 13, 2026 (Agencies):** Taküm tetsür Twenty20 World Cup nung senpet ajak senteper USD million 8.8 agütsütsü. Iba asayamung akokba team nem USD million 2.3 agütsütsü, ta International Cricket Council (ICC)-i Hombarnü metetdaksü.

Team 12 asayatsü aliba asayamung ya England aser Wales na nung June 12 nü nungi tenzüka asayatsü. Iba asayamung ya tesüsa New Zealand-i koka lir. NZ team-iba T20 World Cup ya 2024 küm akok, koba parnok asoshi iba asayamung mezüngbuba akokba liasü.

"Runners-up tem nem senpet USD million 1.17 agütsütsü. Semifinal nung tamakok anguba team anaprongla nem senpet USD 675,000 agütsütsü," ta ICC-i ashiba den asayamung nung shilem agiba team ajak nem senpet USD 248,000 agütsütsü ta shisem.

Senpet ya taoba küm asem tsüingda Indian subcontinent

nung tetsür aser tebur World Cup tem nung agütsüba dang nungibo ishiba asütsü.

Taoba küm India aser Sri Lanka na nung asayaba tetsür 50-over World Cup nung senpet ajak senteper USD million 13.4 agütsü, koba ICC asayamung ka nung senpet timtiba agütsüba liasü, aser 2022 küm dang nungi 297% agi timba liasü. Iba asayamung akokba India team nem USD million 4.5 agüja liasü.

2023 küm tebur 50-over World Cup koba India nung asaya liasü, iba asayamung nung senpet ajak senteper USD million 10 agütsü aser taküm India aser Sri Lanka na nung asayaba tebur T20 World Cup asaya nung senpet USD million 11.25 agüja liasü.

"Investment aser maongka timba akümba ajanga tetsür cricket asaya maneni renloka odar aser iba ajanga alima ajunga nung tetsür asayarterm nungtugu akümba aser parnoki temelenshi bener arutsüba sayur," ta ICC CEO Sanjog Gupta-i ashi.

## Italy FIFA World Cup asayatsü maongka angutsü akok



**Rongchii/April 13, 2026 (Agencies):** Italy football team shirnok FIFA World Cup asem tashi atonga qualify mesüteti lir, parnok lucky loser ama taküm World Cup nung asayatsü maongka angutsü akok, kechiyong United States nung asayatsü aliba iba asayamung nung ya Iran-i shilem magitsü akok, koba ita ana majung tsüingda tenzüksü lir.

FIFA World Cup ya June 11 nü tenzüksü, saka iba asayamung nung Iran-i shilem agitsü magitsü mejangja, kechiyong parnok dang United States den rara nung lir, kong taküm Mexico aser Canada na den külemi World Cup ayongzüka asayatsü lir.

Iran aser United States na tsüingda tang hopta ana atema

ceasefire benoker lir, ajisüaka yimjung atemasensaksem takok mongutetba sülen, teti atema yimjung ka benoktetsü mebenoktetsü mejangjai lir.

Linük ana rara manenra Iran team FIFA World Cup nung asayatsü masayatsü majengjai akümtsü. Gianni Infantino-i FIFA-ibo Iran World Cup nung shilem agidaksüner ta shiogo, aser plan B, C mesüra D mali aser plan A dang lir ta shiogo. Paisa, Iran-i kidang aser bendanglen pei nüburtem tenung nung nokdaker ta ashi.

Ajisüaka Donald Trump shiba Infantino den kanga junga sendaktepa lir, pai Iran nungger football asayarterm nem tekümdangtsü metetdaksüogo aser ashiba agi, parnok FIFA World Cup atema pelashishia

jaoktsü, saka parnok taküm aser tekümsükba dak sendakba nung ken o mejangja asünung parnoki shilem magiba tajungba asütsü ta shiogo.

Italy team-i iba ita tetenzüklen play-off nung Bosnia and Herzegovina makokba sülen parnok FIFA World Cup atema qualify mesütet, iba tetezü World Cup pezüben koker aliba team ya taküm agi asemenbuba WC atema qualify mesütet. Parnok tatemsa 2014 küm asaya liasü.

Tamakok anguba sülen head coach Gennaro Gattuso-i pa mapa toktsüogo. "Temulung retreta aser onok nükjidong metongtetba sülen ni national team manager ama kü tenure idaki tembanger," ta pai ashi.

Ajisüaka Italy asoshi timla tilaka lir. Iraq assistant coach René Meulenstein-i ashiba agi, AFC qualifier nung temaba jenjang nung aliba team ama Iraq-i Iran melentsü aser United Arab Emirates team Suriname aser Bolivia na asaya takoker den asayatsü.

"Ajisüaka olulu osang kar ajanga ashiba agi, FIFA-i tatembangbuba telemtetba agira parnoki Iran melentsü atema rankings nung temaba jenjang nung aliba team shimtsü akok, koba Italy lir," ta Meulenstein-i ashi.

## Rohit Sharma hamstring yiruba scan süogo


**Rogchii/April 13, 2026 (Agencies):** Taoba India aser Mumbai Indians captain Rohit Sharma hamstring yirur alitsü ta bilemba asadangtsü asoshi scan süogo, ta TOI-i metetdaksü.

Pa Brehostibarnü Punjab Kings den asayatsü aliba asaya nung asayatsü masayatsü aji scan agiba result adokba sülenang jangjatsü.

"Hau Rohit hamstring koma yiru aji jangjatsü atema Hombar anepdang MRI (HL Reliance Hospital nung) agiogo. Scan agiba sülen result mejungra pa asaya ka ana masayatetsü akok," ta iba ken o jangja aliba source kati TOI dang ashi.

Deobarnü Wankhede Stadium nung Royal Challengers Bengaluru run 18 agi makokba asaya nung arishi küm 38 tain asayar ya yirur tuguatoksüsa aküm. Pai ball 13 nung run 19 yanglur aliba mapang over trokbuba nung tuguatok. Pai four ana aser six ka züka liasü.

Yirur metugu tsüingda Rohit ya ground telung nung MI physio-i temang anepalua liasü. Mapang tatsüka asaya anena atar temang anepaluba sülen pa tanaben batting amen tenzük saka masayatetsüsa akümba ajanga ground toktsür



tuguatoksüsa aküm.

Rohit ya taoba mapanga hamstring yiruba ajanga timtema aruogo.

"Ni ken o kanga jungabo mejangja, saka hamstring nung timtem kar alitsü südi, ajisüaka kechi timtemar ajibo ni meshitetsü. Ni dugout nung liasü anungji kü ket nung osang aikabo mali," ta teammate Sherfane Rutherford-i asaya tembangba sülen ashi.

Rohit shiba tawa MI nungi asaya tenzükür küm 15 jungogo, pai taküm IPL nung asaya pezü nung run 137 yanglur lir, kong half-century ka yangluba densema lir. Par team asoshi pa ya kanga dang tongtibang asayar ka asütsü, shirnok mezüngbuba asaya pezü nung asem nungbo tamakok ngur lir.

## **BILEMDANGANG**

**"Nü ket nung kechi aka iba atema tenung asangtsü angazükang."**